

Comunicado di Rene Herd  di AVP

E tendencia di caida di MEP y crecimiento di AVP a sigui

ORANJESTAD - Durante di e conferencia di prensa semanal di partido AVP, Rene Herd  a papia di e interpretacionnan cu hende ta duna na e resultado di eleccion. Segun Rene Herd  ta un splicacion tin: Pueblo di Aruba a scoge partido AVP cu mas cu 30 mil voto pa goberna nos pais. "Nunca prome den historia di nos pais for di Status Aparte, pueblo a scoge cu un claridad y entusiasmo asina grandi. Sinembargo nos a tende e lider di MEP bisa cu nan a gana y cu MEP a hasta bay dilanti. Segun mi e ta papia pa fortifica su posicion den su partido. E unico realidad ta cu MEP a perde mas cu 2000 voto y un asiento compara cu 2009. AVP a gana mas cu 7000 voto y un

asiento compara cu 2009." Segun Rene Herd  e tendencia di e ultimo tres eleccionnan na Aruba a continua: MEP ta sigui perde voto y sosten den pueblo. AVP ta sigui crece den voto y den sosten den pueblo. E tendencia aki no ta desconoci pa MEP. Nan a wak e ta sigui y nan no por a stop e tendencia aki. Hasta cu e figuranan historico cu nan a bolbe uza y maluz den campaña. Nan no por a stop e tendencia aki cu ta e deseo di pueblo.

KICO E TENDENCIA TA ENCERA

E tendencia di caida den sosten di pueblo pa MEP y un crecimiento continuo den voto y sosten pa AVP, ta consecuencia di loke pueblo pa

spera y desea pa nan mes y pa nos pais. E ta tambe e consecuencia di loke partidonan tin como contesta riba e deseo y expectativa di pueblo. Segun Rene Herd  loke pueblo ta spera di politica ta basa riba e experiencia di pueblo cu desahoy di Aruba den pasado y di e aspiracionnan cu pueblo tin awor.

Tanto e aspiracionnan di hobennan como di ciudadanonan mas adulto. Rene Herd : "Pueblo hoben y adulto kier wak trato igual. Trato husto pa un y tur. No mas privilegio pa un y medida pa otronan. Hoben y adultonan na Aruba ta anhela pa bay dilanti. Nan kier wak oportunidadnan nobo pa nan pais y pa nan mes den esaki.

Nan kier wak nan calidad di bida mehora. Un mayoria grandi di pueblo no ta spera pa gobierno haci tur cos pa nan. Loke si nan kier pa gobierno crea oportunidadnan nobo pa nan. Pueblo kier bon servicio di departamentonan di gobierno.

Nan kier pa companianan di gobierno opera bon, cu servicionan pagabel y di bon calidad. Pueblo trahado y nan famia kier wak mas igualdad entre trahadonan den gobierno y den sector priva. Nan kier wak solucionnan duradero y moderno pa e retonan cu nos pais tin. Nan kier wak un gobierno cu ta habri pa nan preocupacionnan. Un gobierno cu ta scucha y envolve

pueblo den cosnan grandi y chikito di nos pais.

Un gobierno cu no ta exclui ningun, pero inclui tur. Miho cuida medico. Miho condicionnan den nan bario y educacion cu ta duna mas oportunidad den bida.

Esaki ta e expectativa y deshonnan di pueblo. E diferencia entre AVP y tur e otro partidonan ta den e forma cu nan ta atende cu e deseo y aspiracionnan di pueblo. AVP a demostra caba di ta inclui, scucha y envolve tur hende. AVP a mustra cu e ta trahando pa crea un economia moderno y mas diversifica, cu mas oportunidad di carera pa hobennan den futuro. AVP a demostra di ta stimula crecimiento economico pero den balansa cu bienestar di tur hende. E otro partidonan di lo contrario no ta presenta solucionnan.

Nan tin proyectonan fantastico cu despues di eleccion ta bira proyectonan fantasma. Nan tin ideanan fragmenta cu nan a baha for di internet, pero sin e analisis cu ta rekeri pa plannan concreto pa nos pais. Otro partidonan no a demostra ni den campaña di ta habri pa tur hende, manera AVP si ta haci. Pueblo ta wak e diferencianan importante aki y p'esey ta sigui sostene AVP pa goberna nos pais." Asina Rene Herd  a splica, mustrando cu e resultado di eleccion ta basa riba e diferencia entre loke partidonan ta ofrece pueblo pa gobernacion di nos pais. □